



Bersama
Prof Dr Taufiq
Yap Yun Hin

HARIAN METRO 31/5/2018 p.29

Kemuliaan manusia melebihi makhluk lain

Allah SWT memuliakan seluruh manusia berbanding dengan ciptaan-Nya yang lain.

Sepertimana firman Allah yang bermaksud: "Dan sesungguhnya Kami muliakan anak-anak Adam, Kami angkut mereka di daratan dan di lautan. Kami beri mereka rezeki dari yang baik-baik dan Kami lebihkan mereka dengan kelebihan yang sempurna atas kebanyakan makhluk yang Kami ciptakan." (Surah al-Isra', ayat 70)

Allah memuliakan penciptaan seluruh manusia sama ada mereka Muslim dan bukan Islam.

Itu adalah satu penghormatan berdasarkan

ayat di dalam surah at-Tin, ayat 4, yang bermaksud: "Sesungguhnya Kami menciptakan manusia dalam bentuk yang sebaik-baiknya."

Manusia bukan hanya diberikan kemuliaan, tetapi lebih utama kemuliannya daripada makhluk lain termasuk malaikat yang sepenuhnya hanya beribadat dan bertasbih memuji Allah.

Sedangkan manusia dapat menikmati makan, minum, berpakaian, berkahwin, tidur dan beristirahat.

Bukti menunjukkan manusia lebih mulia daripada makhluk lain ialah selepas Allah menciptakan Nabi Adam.

Allah memerintahkan

para malaikat untuk sujud kepada Adam seperti tercatat dalam surah al-Baqarah, ayat 34 bermaksud: "Dan (ingatlah) ketika Kami berfirman kepada para malaikat: Sujudlah kamu kepada Adam, maka sujudlah mereka kecuali Iblis, ia enggan dan takabur dan adalah ia termasuk golongan orang-orang yang kafir."

Satu lagi tanda kemuliaan manusia melebihi makhluk lain adalah apabila dilantik sebagai khalifah untuk memimpin alam ini.

Firman Allah bermaksud: "Dan (ingatlah) ketika Tuhanmu berfirman kepada Malaikat: "Sesungguhnya Aku hendak menjadikan seorang khalifah di bumi".

(Surah al-Baqarah, ayat 30)
Mereka bertanya (hikmat ketetapan Tuhan itu dengan berkata): "Adakah Engkau (Ya Tuhan kami) hendak menjadikan di bumi itu orang yang akan membuat bencana dan menumpahkan darah (berbunuh-bunuhan), padahal kami sentiasa bertasbih dengan memuji-Mu dan mensucikan-Mu?"

Tuhan berfirman: "Sesungguhnya Aku mengetahui akan apa yang kamu tidak mengetahuinya."

Konsep keinsanan manusia meliputi individu berilmu, harmoni, berprestasi, maju, kredibiliti tinggi, beretika dan berakhlak mulia.

Manusia diberikan akal untuk berfikir dengan melihat kebesaran Tuhan dan mampu membangunkan dengan membawa kemajuan kepada diri dan masyarakat.

Firman Allah yang bermaksud: "Sesungguhnya pada yang demikian itu benar-benar terdapat tanda-tanda bagi kaum yang berfikir." (Surah ar-Rum, ayat 21)

Dengan kurniaan akal menjadikan syariat Islam dapat dilaksanakan. Manusia berakal mampu berfikir, menelaah dan membuat penilaian baik dan buruk sesuatu perkara.

Manusia yang tidak berakal seperti orang gila dan anak-anak kecil tidak

dibebankan baginya syariat Islam seperti solat, puasa, zakat dan mengerjakan haji.

Allah juga tidak menciptakan manusia dengan sia-sia. Manusia dibekalkan ilmu pengetahuan bagi membolehkan mereka menerokai alam ini.

Renungan pertanyaan Allah kepada manusia, "Katakanlah (wahai Muhammad) apakah sama orang-orang yang mengetahui dan orang-orang yang tidak mengetahui. Sesungguhnya orang yang berakallah yang dapat menerima pelajaran. (Surah az-Zumar, ayat 9)

Penulis ialah Presiden Persatuan Cina Muslim Malaysia (MACMA) dan Profesor di Jabatan Kimia, Fakulti Sains Universiti Putra Malaysia